

## Ebe ni iJudu Ọ kẹkẹ

<sup>1</sup> Mhẹmhẹ iJudu ni mhia ga iJesu iKirisiti, ni mhi gbo khi inyoḡhuo iJemhisi mhi kẹkẹ ebe ona.\*

Eni Ẹshinẹgba Ita ọ zẹ, ni ọ nono ingme oyẹwẹ, ni a ri akhukhu oyi iJesu iKirisiti khukhu, mhi kẹkẹ ọli ghi.

<sup>2</sup> Ilẹlemhi ali opfomhẹ ali inono ni e gbeku ọ, e ka khi oyẹ.

### *Epfua oyi ẹgbọ esesẹ ẹgbhọli*

<sup>3</sup> Emọle mhẹ ni awa ga a ga Ẹshinẹgba, o mema ghole mhẹ ni mhi kẹkẹ ingme imiepfuese ni awa mhọli shi ebe ghi ẹ, ni mhi rọ mẹ khi o mu egbe nẹ ni mhi ri ebe ya ri udu shi ẹ ọ, ni a doḡe gbelighi shi oni irudunga ni Ẹshinẹgba ọ rọ nga ẹgbọ eyọli oḡo agbọagbọ kpa.

<sup>4</sup> Oni irudunga o she la okhena, irari khi ẹgbọ ni ẹa ya na ulishi Ẹshinẹgba e she kuma awa ọ ni awa aa lẹsẹ. Eni e mu ilẹlemhi oyi Ẹshinẹgba nyene, khi eri o ri ẹghẹghẹ na wẹ e rọ ke li itsẹḡo. E kie iJesu iKirisiti ni ọ khi Ọga ali Ọnọmhue oyawa. O she tẹsẹ ni Ebe-no-pfuasẹ o rọ kpẹ te eke ngme ọli khi eni e ya pfua ẹlẹ iguezọ e khi.

<sup>5</sup> Irari khi ini a ririẹ kpẹ kie lẹsẹ ena nya, mhi kie gbolo ẹ yele ẹ le khi Ọnọmhue ọ rue ẹgbọ eyọli rọte

---

\* **1:1** Li zẹ *iMat 13.55; iMak 6.3*

eke iJipiti lasele, ama, eḷelese, o pfuse eni ẹa lama miesuḡ ni e la wẹ iteva-a.†

6 A sato khi igẹni ni ẹa mu omhẹse ni a rọ na wẹ mhue, ni e lase ashini a rẹ wẹ shi-a. Eri o rẹwẹ shi obili, o ri iwẹghẹ na agboagbo gẹ wẹ, o rẹwẹ e khe iguezo ona ogbele ni o fune ni a la ya pfuse wẹ a.

7 A sato khi igho egbo iSodomu ali iGomora ali eni e la eoli ni e mama wẹ e li i ngeli, ni e rọ ku abo lo itsebo ali ighue ebe imumu. Eri a na wẹ osoli na agboagbo, rọ rẹ wẹ rieḷe irokhokho, rọ tse agua ye egbo kpa.‡

8 Igho eni egbo ena, e li la elena ni o rẹwẹ lamhe ri ichimhi mu egbe wẹ, e ri ukpeloe gbe omhẹse oyi Eshinegba, e tigbe gbo me igeni na idane bie.

9 Egbegbi ageni ni o fune nya ni a lu iMakięni o a fe gbudu ri ungmehi imebie pfueche Okphaghie-a, abi e rọ khe olimhi oyi iMosisi, ama eri o lese lie, “Onomhue o kie e.”§

10 Ama eri eni egbo ena e kie pfi itsue e manya egbo shi emini ẹa ririe lese udi oli. Eri e li abi elamhako ni ẹa ya sa. Angeli obe oyewe o ze ni e rọ pfua.

11 Epfua e ya pfua! Ode oyi iKeni e rote, eri itobo ukpago ri egbewe ni ode ni o a gbe akanya de abi oni iBelamu o rieḷe. E nga engo, abi iKora o li nga engo, ni o rọ li pfua.\*

12 Egbo ukhimhi elemhi e khi ini e nu e la ukue ni a la le eminale inono. E ri umha a na omama ali ulishi, e rọ nu e a le eminale. Egbewe tse, e so

† 1:5 Li ze Okiali 12.51; iNoba 14.29-30 ‡ 1:7 Li ze Igbae 19.1-24

§ 1:9 Li ze iDan 10.13,21; 12.1; Iro 12.7; iDeut 34.6; iZaka 3.2

\* 1:11 Li ze Igbae 4.3-8; iNoba 22.1-35; 16.1-35

eminale ẹ shi idi. Eri e li abi ùza ni akpekpeli o tsua kia. Eri e li abi ẹra okasẹ ni ẹa ya mọ idumhi, ni a vu a pfa, e khakha.

<sup>13</sup> Eri angeli oyẹwẹ o ri egbe a khasẹ abi ofulu oke oniẹmhi ni akpekpeli oọ tsughuse. Eri e li abi ikpẹtata ni ẹ kele-a, ni Ẹshinẹgba o ri obili ni o limhi shi eke ẹ khe agbọagbọ.

<sup>14</sup> Agbhotu ishilua, Enọki o khi ini a rote Adamu leli oḷi, ayẹmhe o ro ngme ingme angme-shi-ekẹ oyi ẹgbọ ena, ni o la liẹ, “Ghe khi Onomhue oọ bhale, loli ali igeni agbele agbele eni e pfuase eyoli,

<sup>15</sup> ni o ro bhale ya gue ogbọkpa ezọ, ni o ro pfa ezọ mu ẹgbọ ebe nya shi ingeli ebe ni e ri ode obe ngeli, ali ingmemhi ebe ni e toto ni ẹgbọ ebe e ngme deba li.”

<sup>16</sup> Ẹgbọ awọlo ali eni ẹẹ me umha-guẹli oyi ogbọ e khi, oguẹmhe obe oyi egbewẹ ẹ deba, e ri unu ẹ nyanọ ifele shi osomhi ro ti egbewẹ nga. E ri ikhomhi akọ ẹ titi ẹgbọ, ini o ba me asha ti we egbe.

### *Itse-agua ali Ude*

<sup>17</sup> Ama emole mhe, a sato emini ighiusomhi na keẹ eyi iKirisiti Onomhue e ngme shi eke.

<sup>18</sup> Ee gueye ẹ khi, “Ogbele ikpukhokho, ẹgbọ ni e ri ẹgbọ ẹ li egia, ni e ya ke deba oguẹmhe ebe eyewẹ e ya la o.”†

<sup>19</sup> Eni ẹgbọ ena ẹẹ pfi okemhi shi ẹ iteva. Isamhi agbọ, ni udu oyewẹ o gueye we, ẹẹ deba. Ẹa mholi Ayẹmhe oyi Ẹshinẹgba.

<sup>20</sup> Ama ẹẹ emole mhe, a ke sese egbe ẹ ode irudunga ni o pfuase. A ke lema elemhi Ayẹmhe-no-pfuase

---

† **1:18** Li ze 2 i*Pit* 3.3

<sup>21</sup> A la elemhi inono oyi Eshinegba abi a li migha a khe ilelemhi oyi iJesu iKirisiti Onomhue oyawa ni o re e bhale agbo na agboagbo.

<sup>22</sup> Le elemhi eni e mhue akhokhomhe shi irudunga oyewe.

<sup>23</sup> Tsumhi egbo ni ee nono ni wewe e mie iwali osese egbholi suo abine khi u wa ti ogbo erali lasele, lelemhi egboese ni e nono ikpaghiobo. Ama mu egbe e ini e khi yese li de pfilo olamhe eyewe.‡

### *Iromhi ikueghie*

<sup>24-25</sup> Awa ri ikueghie na Eshinegba Otsumhi oyawa itobo iJesu iKirisiti Onomhue oyi awa! Loli o dobe ya mu e mholi ini u khi de, ni o re pfuase, re e ghele odalo oyoli ni o mholi ufumhi. Eshinegba, lolighuo o fute ni a ri ufumhi, ekpe, ekpabo ali omhese e na, neni a me igbaekele agbo, ghe memena, ali agboagbo. Atse.

---

‡ **1:23** Abi a li keke ona shi elemhi iGiriki khi. 'Khi mholi emini u ri itsua ni idiegbe olamhe e ri ichimhi a mu li.'

**Ebe-No-Pfuasę Ishobo Onogbo**  
**New Testament in Ivbie North-Okpela-Arhe**  
**(NI:atg:Ivbie North-Okpela-Arhe)**

copyright © 2012 Wycliffe Bible Translators, Inc.

Language: Ivbie North-Okpela-Arhe

Translation by: Wycliffe Bible Translators, Inc.

**Copyright Information**

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789194797

**The New Testament**

in Ivbie North-Okpela-Arhe

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

---

PDF generated using Haiola and XeLaTeX on 18 Apr 2025 from source files  
dated 29 Jan 2022

03be06b0-68fd-500b-b9a9-6bca4b63979a